

Nuusbrief van die Peter Henrich Henning Familiebond

Theewaterskloof Landgoed
Villiersdorp

Posbus 121
6848 Villiersdorp

Tel: 028 840 0113

www.henning.org

E-pos: olie4@henning.org

Verskyn vier keer per jaar: Februarie, Mei, Augustus en November



Henning museum op Internet

Dit is vir ons baie aangenaam om aan te kondig dat die Henning museum by die Henning webwerf op Internet by www.henning.org nou ten volle funksioneel is. Ons wil graag al die Hennings van Suid-Afrika hartlik uitnooi om na die Henningmuseum te gaan kyk. Op die openingskerm klik op “Museum” en blaai deur die virtuele Henning-familieuseum.

Ons vind nêrens dat daar elders ter wêreld nog ‘n virtuele familieuseum bestaan nie. As dit so is, is ons museum die eerste virtuele familieuseum.

Bondsekretaris, Olivier Henning en Jannetta Steyn, sy suster Leonie se dogter, het hard gewerk om dit saam te stel. Terwyl Olivier die uitstalling voorberei het, was Jannetta verantwoordelik vir die programmering — sy is immers ‘n Doktorsgraadgekwalfiseerde rekenaarwetenskaplike. Hoewel haar spesialiteit Bio-informatika, sagteware ingenieurswese en rekenaarmodulering is, is haar algemene kennis van die vakgebied van die rekenaarwetenskap so hoog dat sy enige projek sal aanpak en baasraak. Jannetta bestuur natuurlik die Henning webwerf op internet. Sy is ‘n navorser by die Departement van Rekenaarwetenskap aan die Universiteit van New Castle in Engeland.

As julle klaar gekyk het, lewer asseblief kommentaar in die gasteboek by die museum. Klik gerus op die toepaslike sleutel aan die bokant van die openingskerm.

Versprei asseblief hierdie boodskap na al u familielede wat internettoegang het en help ons so om meer Hennings oor te haal om lede van die Henning Familiebond te word.

Sluiting van die Henning-Uitstalling in Aliwal-Noord

Dit was vir ons 'n hartseersaak toe ons die Henning uitstalling in die Kerkpleinmuseum te Aliwal-Noord moes sluit weens die vyandige houding en aksies van die Maletswai stadsraad en munisipaliteit.

Vanaf 1987 tot 1994 was daar die hartlikste samewerking tussen die Henning Familiebond en die stadsraad en munisipaliteit van Aliwal-Noord. Met die oornamen van die stadsraad in 1994 deur 'n vyandiggesinde politieke party en die aanstelling van (skynbaar) onbevoegde amptenare, het hierdie hartlike samewerking tot 'n einde gekom. Die munisipaliteit het gestaak om enige instandhoudingswerk aan die gebou van die Kerkplein Museum te doen en het allerlei struikelblokke in die weg van die museumkomitee gerol. Die museumkomitee, wat uit vrywilligers bestaan – hoofsaaklik bejaardes van die dorp - het ons begin waarsku dat ons uitstalling in groot gevaar verkeer en verwyder sal moet word.

Die twee ou en kranklike manne, Olivier Henning en sy broer, Fanie het die eerste week van September 2019 met Fanie se ligte bakkie na Aliwal-Noord gereis om al die Henning artefakte wat daar uitgestal was, te gaan haal. Al hierdie items word tans tydelik by Olivier se huis geberg.

Ons wil graag alle items aan die oorspronklike eienaars terugbesorg, maar wys ongelukkig uit dat die familiebond nie die geld het om dit op enige wyse na die oorspronklike eienaars terug te stuur nie. Meeste van die donateurs is in elk geval al oorlede. As daar mense is wat graag die items wat hulle geskenk het, wil terughê, sal hulle dit self by Olivier se huis in die Villiersdorpdistrik moet gaan haal.

Die plan is om alle onopge-eisde artefakte wat werklike geskiedkundige waarde het, daarna aan te bied aan die Erfenisstigting en/of die Oorlogsmuseum van die Boererepublieke. Die Erfenisstigting is verantwoordelik vir die instandhouding van Afrikaner-monumente en — gedenktekens, soos die Voortrekkermonument, die Bloedrivierterrein en verskeie ander monumente en gedenktekens landwyd. Die Henning Familiebond is 'n volwaardige lid van die Erfenisstigting en 'n Vriend van die Oorlogsmuseum.

Geskiedenis van spesifieke Hennings

Ons probeer om in elke nuusbrieff die geskiedenis van minstens een Henning (of Henning familie) te vertel. Soms vertel ons nuwe stories, waarvan ons nou eers kennis geneem het, maar in ander gevalle herhaal ons die stories wat reeds in die Henning Familiekroniek opgeneem is, maar vandag tussen bykans 13 000 ander mense in die familiechroniek verskuil lê, waar dit moeilik raakgesien sal word.

Met die Henning-museum op internet wat nou in volle werking is en die prominente rol wat die Kerkpleinmuseum in Aliwal-Noord vir baie jare gespeel het, het ons besluit om meer te vertel van Jan Hendrik Henning, gebore 17 Mei 1805 wat in 1857 as 'n ouderling van die gemeente in Aliwal-Noord, op die boukommissie gediens het wat vir die bou van die eerste kerkgebou verantwoordelik was. Hy en a2.b7.c8. Olivier JGC Henning was die enigste twee



a2.b1.c3. Jan Hendrik Henning *17-5-1805 en sy tweede vrou, Elizabeth Marguerita (gebore Krugel) *15-6-1813

Hennings wat 'n prominente rol in die totstandkoming van die eerste kerk in Aliwal-Noord en dus ook ons uitstalling, gespeel het.

a2.b1.c3. Jan Hendrik Henning is op 17 Mei 1805 gebore op die plaas Zoetfontein in die Graaff-Reinetdistrik. Hy is op Sondag 10 November 1805 in die kerk te Graaff-Reinet gedoop. Later is die gebied “Achter de Sneeuwberg” by die distrik van Cradock ingedeel.

Jan Hendrik word groot op Zoetfontein. Weens die gereelde droogtes en ander natuurrampe, soos sprinkane en trekbokke wat elke grasrietjie opvreet, was die boere in hierdie grensdistrikte voortdurend onder groot druk.

Na sy eerste huwelik met Anna Magdalena Du Plessis, begin hy, sy vader en sy broers, soos die meeste trekboere, dieper die binneland in trek op soek na beter weivelde vir hul vee. Tussen die jare 1819 en 1825 bevind hulle hul in die Brakrivier Veldkornetskaps — die gebied tussen die teenswoordige Middelburg en Hofmeyr.

Twee van sy ooms het gedurende daardie jare plase daar besit. Hierna trek hulle na die gebied wat later die distrik Albert sou word, waar hy 'n plaas in die omgewing van die huidige spoorweg-sylyn HENNING, wes van Stormbergstasie (naby Burgersdorp) bekom. Teen ongeveer 1836/37 trek hy na 'n plaas in die distrik van die latere Aliwal-Noord. Hy noem die plaas Elandshoek. Verskeie van sy kinders word op Elandshoek gebore.


Sy liewe vrou, Anna, ontval hom gedurende 1873 toe sy slegs 62-jaar oud was. Hy trou hierna met Elizabeth Marguerita (gebore Krugel). Sy was die weduwee van Petrus Bothma en daarna Cornelus Cloete.

Later in Jan Hendrik se lewe het hy en sy tweede vrou, Elizabeth hulle egter op die dorp Aliwal-Noord gaan vestig, waar hy op 6 Januarie 1881 sterf. Hy is gevolglik een van 'n paar Hennings uit hierdie tydperk wat op 'n dorp, en nie op 'n plaas nie, oorlede is. Hy is in die ou begraafplaas in Durbanstraat, Aliwal-Noord begrawe.

Omdat die sandsteen grafsteen reeds erg begin verweer het, het een van sy nasate, die oud polisieman (wyle) a2.b1.c3.d7.e9.f2. Genl-Maj Pieter H S Henning *1907, gedurende 1993 'n koperplaat met sy besonderhede op die graf aangebring.

Baie van Jan Hendrik en sy seuns se handwerk op Elandshoek — onder andere 'n klipmuur van etlike kilometers lank en 'n opstal op die plaas — kan vandag nog besigtig word. Die Aliwal-Noord dorpsmuseum met die Henning uitstalling, is tussen 1991 en 2019 in hierdie ou kerkgebou waar Jan Hendrik Henning en Olivier Henning so 'n belangrike rol gespeel het, gehuisves.

Geskiedkundige foto-albums



Die kwaliteit leeromslag van die foto-album wat na ongeveer 150 jaar nog in goeie toestand is. Ongelukkig begin die binne bladsye weens die baie hantering al verweer raak

Dit is altyd lekker om deur ou foto-albums te blaai, want dit roep gewoonlik goeie herrinneringe uit die ou dae op. Die oudste foto-album wat ons in die Henning uitstalling in die Kerkplein-museum in Aliwal-Noord uitgestal het en wat nou in die Henning virtuele museum gesien kan word, was 'n album wat aan a2.b7.c8. Olivier Johannes Gerhardus Cornelis Henning, gebore 1 Desember 1834 en sy vrou Cornelia Susanna (gebore Kotze) behoort het.

Daar word geskat dat al die foto's in die album tussen die jare 1860/70 en 1895 geneem is.

Die tragedie is egter dat, met uitsondering van een foto, geen foto's byskrifte of name op het nie. By slegs enkele van die jongste foto's kon kleinkinders van Olivier - en Cornelia Henning, (wat almal al vir baie jare dood is) sommige van die mense, soos hulle ouers en ooms en tantes op die foto's uitken. Daar word ook

vermoed dat daar selfs 'n foto of foto's van Olivier se ouers, a2.b7. Gert Frans Henning, gebore April 1785 en sy vrou Gerbreg Leviena (gebore Olivier) behoort te wees omdat hulle eers in 1873 en 1880 onderskeidelik oorlede is, maar omdat niemand hulle kon uitken nie, sal dit vir altyd 'n geheim bly.

Die enigste foto met 'n naam op, is 'n foto van 'n swart man. Mens kan sien dat hy 'n belangrike persoon moes gewees het. Die naam Kreli is op die foto geskryf. Foto op die volgende bladsy.

Bondsekretaris Olivier Henning het as kind met hierdie album in hulle huis grootgeword. Hy het geweet dat dit sy pa se oupa en oma se foto-album was en het dikwels deur die album geblaai en na al die interessante foto's gekyk. Hy onthou dat hy navraag oor Kreli se foto gedoen het en sy pa aangedui het dat Kreli die "koning" van die Xhosas was en dat hy en oupagrootjie Olivier mekaar goed geken het as gevolg van besigheidstransaksies met mekaar. Olivier het dus beseft dat hierdie 'n belangrike foto was.



Sommige van die foto's in die album waar ons mense kon uitken. Die foto links onder is van Olivier Henning *1834, eienaar van die album, as 'n man van 40/50-jaar. Die foto is dus ongeveer 1875 / 80 geneem. Op drie van die foto's verskyn Olivier Henning *1869 op verskillende ouderdomme en twee van sy susters.



Soos die meerderheid foto's in die album, kan niemand op die fotos links uitgeken word nie

As mens deur geskiedenisboeke blaai, kom mens gou agter dat Krelī werklik 'n belangrike man was. Hy is ongeveer 1818 gebore en was die seun van Hintsa, die vorige Xhosa opperhoof. Hy was vanaf 1835 die opperhoof van die Xhosas en was ook bekend as *Sarili ka Hintsa*. Hy was die vyfde leier van die Gcaleka subgroep van die Xhosavolk, voordat hy Oppperhoof van al die Xhosas geword het. Oppperhoof Krelī is in 1892 in Shorola, in Bomvanaland oorlede. Hy was dus 57-jaar lank Oppperhoof.

Na die kapitulasie van die Suid-Afrikaanse regering in 1994 het Bondsektaris Olivier Henning 'n beleidsdokument van die nuwe Oos-Kaapprovinsie onder oë gehad. Dié provinsiale regering het die voorneme uitgespreek dat hy hom gaan beywer om sy museumdienste verteenwoordigend van al die bevolkingsgroepe te maak.



**a2.b7.c8. Olivier J G C Henning
*1834, sy vrou Cornelia en
kleindogter, Cornelia Schoombee.
Die foto van Opperhoof Kreli was in
hul album gemonteer**

**Kreli *1818 Opperhoof van die
Xhosas vanaf 1835 tot 1892**



In die gees van versoening tussen die kultuurgroepe in Suid-Afrika, het Olivier 'n pragtige portretvergroting van die foto van Kreli laat maak, met die idee om hierdie portret aan die Oos-Kaap museumdienste te skenk. Hy het die inskripsie op 'n koperplaatjie in Xhosa, Afrikaans en Engels laat aanbring dat dit 'n portret van Kreli, Opperhoof van die Xhosas vanaf 1835 tot 1892 was en dat die portret deur die Henning Familiebond geskenk is. Verskeie briewe is hierna aan die owerhede in Bisho gestuur, waarin hy aangedui het dat die Henning Familiebond graag die portret van Kreli aan hulle wou skenk.

Helaas! Hulle het nie eens ontvangs van enige van Olivier se briewe oor 'n tydperk van 'n jaar erken nie. Ons het tot die gevolgtrekking gekom dat hulle nie regtig in egte Xhosa museumstukke belangstel nie of dat daar niemand was wat kon lees en/of skryf nie. Ons sou dus moes wag totdat iemand aangestel word, wat kan lees en skryf.

Uiteindelik het dit gebeur, want op 15 Mei 1995 skakel 'n Pierre Swanepoel vir Olivier vanaf Bisho. Hy is kort tevore na die Oos-Kaap provinsie gesecondeer en hy was besig om deur al die briewe wat opgehoop het te werk. Hy dui aan dat hulle belangstel in die portret. Hy sou dit persoonlik by Olivier kom afhaal wanneer hy weer 'n stafbesoek in Pretoria moes doen. Dit blyk toe ook sommer dat hierdie Pierre



Bondsekretaris, Olivier Henning oorhandig die portret van Opperhoof Kreli in 1996 aan Mev May De Wet van die Aliwal-Noord museum

Swanepoel en Olivier saam op skool was. Teen Oktober 1995 het Olivier niks verder van Pierre Swanepoel verneem nie en hy het weer Bisho toe gebel. Dit blyk toe dat Pierre se sekondering kort na Mei 1995 skielik beëindig is.

Met wat hier gebeur het, het Olivier die portret in 1996 aan die Aliwal-Noord museum geskenk om in hulle versameling oor die swart stamme van die Oos-Kaap uit te stal.

Kreli het bekend geword toe hy in 1854 die Tembu's verslaan het. Vier jaar later (1858) en in 1873 het hy weer

die Tembu's verslaan.

Teen die Britse regeerders aan die Kaap het hy homself as 'n vaardige diplomaat onderskei. In 1846 het hy Sir Andries Stockenström tydens 'n vredeskonferensie uitoorlê. Die besluite van hierdie konferensie is in 1848 beëindig en dit het die weg gebaan vir 'n vriendskaplike vergadering met Goewerneur Harry Smith, naby King Williamstown. Van 1850 tot 1852 was hy weer in 'n oorlog teen die Britte, maar is verslaan. Hy het in 1853 ingestem tot 'n vredesooreenkoms.

Sy heerskappy is finaal verbreek tydens die veevernietigingsdwalings van 1856 toe 'n jong Xhosameisie, Nongquase voorspel het dat die dag naderkom wanneer alle witmense in hulle land in die see gedryf sal word. Afgestorwe opperhoofde sou uit die dood verrys, hulle veekrale sou skielik met vee gevul word en hulle landerye sou eensklaps ruig met graan gestaan het.

Op daardie dag sou die son bloedrooi verrys en al die graan op die lande sou gereed wees om ge-oes te word. Siektes en ouderdom sou verdwyn. Wit mense, asook diegene wat opdragte verontagsaam het, sou deur 'n sterk wind in die see gewaai word. Om al hierdie dinge moontlik te maak, moes alle vee in besit van die hele Xhosavolk doodgemaak word. Alle landerye en groentetuine moes vernietig word en Opperhoof Kreli en die hele Xhosavolk het Nongquase geglo en het al hulle landerye, groentetuine en veë vernietig.

Ten spyte van alle pogings deur die Kaapse regering en sendelinge om dit te voorkom het hierdie vernietigings voortgegaan. Meer as 200 000 stuks vee is doodgemaak. Daar is spesiale krale gebou waar al die voorspelde veë wat uit die see sou verrys gehou sou word. Die hutte se dakke is ook versterk om die verwagte orkaan te weerstaan.

18 Februarie 1857 was die voorspelde datum waarop al die wonderwerke sou gebeur. Toe die son soos gewoonlik opkom en daar geen teken was van enige van die voorspellings van Nongquase het die hele Xhosavolk besef dat hulle mislei is.

‘n Nagmerrie van hongersnood en wanhoop het op die gewone mense neergedaal. Amptelike syfers het aangedui dat die bevolking van Brits Kaffraria (die huidige Transkei in die Oos-Kaap), vanaf 1 Januarie 1857 tot 31 Julie 1857 van 104 721 mense tot 37 229 geval het. Grootskaalse hulpverlening is deur ander lande gestuur, maar die militêre mag van Krelie se Xhosas was vir altyd gebreek.

Dit is interessant dat ‘n persoon op een klein niksseggende fototjie in ‘n Henning foto-album so ‘n groot invloed op die geskiedenis van Suid-Afrika gehad het. Hoeveel ander sulke foto’s lê nog verskuil in Henning foto-albums?

Die belangrikste les wat ons egter uit hierdie foto-album geleer het, is die belangrikheid om dadelik byskrifte by alle foto’s in foto-albums aan te bring.

Huwelike

Twee huwelike waarby Henning jongmense betrokke was, het onder ons aandag gekom:



1. Pieter Hendrik Henning, gebore 7 Januarie 1993, die derde seun van a2.b6.c1.d3.e5.f3.g4.h6. Pieter Hendrik Henning en sy vrou Deidré van die Strand, is op 1 Desember 2018 by die Zevenwacht Wyn Landgoed, tussen Kuilsrivier en Stellenbosh in die huwelik bevestig met **Fenetta van Zyl**. Fenetta is op 14 Junie 1994 in Port Elizabeth gebore, maar haar ouers, Herman van Zyl en ma Marietjie het toe sy nog baie klein was Kaapstad toe getrek. Sy het dus haar hele lewe lank in Kaapstad gewoon.

Pieter is ‘n fisioterapeut in Durbanville by Van Zyl Fisioterapeute. Hy het sy BSc Fisioterapie graag by die Universiteit van Stellenbosh verwerf, terwyl Fenetta in Stellenbosch as ‘n dieëtkundige werk. Sy het ook haar BSc Dieëtkunde graad aan die Universiteit van Stellenbosch verwerf.

Pieter Hendrik Henning en sy vrou, Fenetta, op hulle troudag 1 Desember 2018 by die Zevenwacht Landgoed, saam met sy ouers, Pieter Hendrik Henning *21-4-1960 en Deidré (gebore Muller). Voor sit oma Elmar Henning (ELIZABETH MARIA TULLINGH *Indonesië 23-6-1929)



‘n Foto van Elrike Henning en Wilhelm Robbertse wat op hulle troukaartjie verskyn het.

2. Die tweede huwelik wat onder ons aandag gekom het, is **a2.b7.c8.d8.e5.f3.g3. Elriké Henning *2-2-1991**, jongste dogter van Pieter Naude Henning en sy vrou Ingrid (gebore Kapp) wat op 21 September 2019 te Magoebaskloof, distrik Tzaneen getroud is met **Wilhelm Petrus Robbertse *26-1-1989**. Wilhelm is in Potchefstroom gebore as die seun van Dr Wilhelm Petrus Robbertse en sy vrou Ria.

Wilhelm (jnr) en Elrike werk saam met Eriké se pa op sy plaas Cashumi in die George's Valley deel van die Tzaneendistrik waar Pieter onder andere groot Bloekomplantasies het. Wilhelm is 'n Meganiese Ingenieur en is die bestuurder van die Behandelingaanleg vir houtprodukte, terwyl Elrike 'n Chemiese Ingenieur en bestuurder van die Lamineerfabriek op die plaas is.


Wilhelm Robbertse (Snr) is 'n geneesheer te Potchefstroom en sy vrou, Ria 'n Wiskunde onderwyseres. Sy kom oorspronklik van Koster af.

‘n Nuwe Henning Baba

a2.b6.c1.d3.e5.f3.g4.h6.i2 Bryan Kenneth Henning *14-1-1990 en sy vrou tjie, Bianca Angela (gebore Basson) *19-7-1992 se eersteling – 'n dogtertjie – is op 1 Februarie 2019 te Somerset-Wes gebore. Die kleinding se name is Iris Angela.

Bryan is natuurlik die seun van a2.b6.c1.d3.e5.f3.g4.h6. Piet (Pieter Hendrik) Henning en sy vrou Deidré van Strand, terwyl Bianca die dogter van Simon Petrus Basson en sy vrou Angela is. Ons glo dat die kleine Iris net vreugde in die lewens van haar ouers en oupas sal bring.

Bryan Kenneth Henning *14-1-1990 en sy vrou tjie, Bianca Angela (gebore Basson) *19-7-1992 en hul eersteling, Iris Angela, gebore 1-2-2019



Sterfte: Gerhardus Stephanis Henning



Gerhardus Stephanis Henning van Kimberley wat op 1 September 2019 oorlede is

a2.b1.c6.d1.e1.f2.g1. Gerhardus Stefanis (Gerhard) Henning gebore 24 Junie 1956 van Kimberley is op Sondag 1 September 2019 aan hartversaking oorlede. Hy word oorleef deur sy vrou Deirdré en hul seun Thomas, sy vrou Vanessa en 'n lieflike kleindogter van twee jaar.

Gerhard word groot en gaan skool te Dealesville. Sy militêre diensplig doen hy te Upington en Riemvasmaak, waarna hy by verskillende takke van die destydse Sentraal-Wes Koöperasie gaan werk. Na dertig jaar diens tree hy af en verhuis hulle na Kimberley, waar hy begin werk by GWK, wat ook 'n landbou onderneming is. Hy werk tot ouderdom 60, toe hy finaal aftree.

Hy was 'n ywerige versamelaar van veteraan motors en het elke moontlike motorskou bygewoon. Hy was ook versot op tuinmaak.

Hy en sy vrou, Deirdré, was twee-en-veertigjaar lank getroud.

Gerhard was 'n toegewyde, geliefde, saggeaarde persoon en sy afsterwe laat 'n groot leemte op talle gebiede.

Henning seun speel Cravenweek



a2.b6.c1.d5.e1.f2.g1.h7.i2.j2.Pieter Jacobus Henning en sy vrou Suzette van Worcester het vir ons laat weet dat hul jongste seun, Justin gebore 13 Januarie 2001 gedurende Julie 2019 aan die Craven - / Akademie week in Bloemfontein deelgeneem het as 'n lid van die Boland-span en aangewys is as die Boland o/18 Akademie-spankaptein.

Justin Henning van Worcester wat aangewys is as die kaptein van die Boland Onder-18 rugbyspan

Henning Davisbeker Tennisspeler



Die 19-jarige Philip Henning van Bloemfontein wat deel was van die Suid-Afrikaanse span in die Davisbeker tenniswedstryd teen Bulgarye

Die Davisbeker tenniskompetisie is jare reeds een van die mees belangrike manstennis-kompetisies in die wêreld en Suid-Afrika skryf gereeld 'n span vir hierdie kompetisie in.

Op 13 September 2019 het Suid-Afrika en Bulgarye se tennisspanne in Kaapstad kragte gemeet in 'n Davisbekerwedstryd in die Europa/Afrika 1 afdeling. Die negentienjarige Philip Henning (a2.b7.c7.d10.e3.f1.g2.h1.) van Bloemfontein, wat tans by die Universiteit van Georgia in die VSA studeer, was een van die lede van die Suid-Afrikaanse span, ten spyte van die feit dat hy nog 'n junior is.

En het Philip hom nie goed van sy taak gekwyt nie! Hy het sy wedstryd teen Gabriel Donev maklik binne 'n uur met 6-2, 6-3 gewen en die Suid-Afrikaanse span gehelp om die toernooi met 4 – 1 te wen. Dit was Philip se eerste wedstryd as lid van die Suid-Afrikaanse Davisbekerspan. Hy het homself weer bewys as een van die tennisstere van die toekoms.

Dit beteken dat Suid-Afrika in 2020 weer in die Europa/Afrika 1

groep sal meeding. Philip is natuurlik die seun van a2.b7.c7.d10.e3.f1.g2. Gerard Carel Henning en sy vrou Carlien van Bloemfontein.

Spogtuin van Marieta van Dijk (gebore Henning)

In die Augustus uitgawe van die tydskrif “Open Gardens of South Africa 2019” word 'n hele paar spogtuine in die Hoekwil area naby Wildernis op die Tuinroete bekendgestel wat op Saterdag 2 en Sondag 3 November 2019 deur die publiek besigtig kan word. Een van hierdie spogtuine behoort aan Gerrit en Marieta van Dijk. Hulle tuin staan bekend as TE DHÔ. Marieta is natuurlik beter aan ons bekend as a2.b6.c1.d3.e5.f3.g5.h4. Maria Cornelia Elizabeth Henning gebore 1 Februarie 1959. Sy is 'n nasaat van een van die Henning families wat in 1905 na Argentinië geëmigreer

en daarna in 1938 na Suid-Afrika teruggekeer het. Sy het ook 'n tydlang, toe sy in Somerset-Wes gewoon het, op die bestuur van die familiebond gedien.

Hoekwil is 'n klein dorpie weggesteek aan een van die hange van die Tuinroete, 7-km



‘n Blik op een hoekie van die pragtuin van Gerrit en Marita van Dijk by Hoekwil, Wildernis wat in die Augustus uitgawe van die tydskrif “Open Gardens of South Africa 2019” vertoon word

vanaf Wildernis. Die dorps-en plaastuine is meestal groot and vertoon die groot biodiversiteit op sy beste. Inheemse bosse, fynbos, alwyne, blomdraende struik, vetplante en baie rose word vertoon in tuine met die pragtigste berg-, meer- en see-agtergrond. Hierdie sal die sesde jaar wees wat die publiek genooi word om hierdie spogtuine te kom besigtig

Gerrit en Marita se tuin was aanvanklik 'n wildernis van dennebome en ander uitheemse plante. Hulle het dit omskep in 'n hawe vir voëls, bye en skoendlappers met 'n verskeidenheid van pragtige plante. 'n Ongewone glanspunt is 'n pragtige dam met 'n eiland in die middel. Hoenders en eende pik-pik gelukkig en tevrede in hierdie ou-wêreldse tuin met wandelpaadjies wat na stil en koel rusplekkies lei. Dit alles maak 'n rit na hierdie pragtige tuin deur en deur die moeite werd.

Geldsake

Oor die afgelope twee jaar gaan dit nie goed met die geldsake van die Henning Familiebond nie. Die stroompie donasies wat ons van ons mense ontvang, word by die dag minder en het dit al nodig geword dat ons van ons spaargeld, wat oor die voorafgaande 38-jaar versamel is, moes begin gebruik om ons rekeninge te betaal. Selfs die druk van ons kwartaallikse Nuusbrief, Ons Haantjie verg groot bedrae geld, om nie eens te praat van rekenaarapparatuur en Internetdienste nie.

Afgesien van die vyf lede wat maandeliks per debietorder bydra, het die volgende lede onlangs bydraes aangestuur:

1. Dr Tjol (M E J) Henning en sy vrou Amanda van Lyttelton, Centurion - R500.00
2. Marthinus (M C) Henning en sy vrou, Henesia van Welkom – R300.00
3. Neels (C B) Henning en sy vrou Bernice van Tampa, Florida, VSA — R1086.00

Ons doen 'n beroep op alle Henning's om dit te oorweeg om van tyd tot tyd 'n donasie, hoe klein ookal, aan die familiebond te stuur. Die Familiebond se bankbesonderhede is as volg:

**FNB Lopende rekening 6265 7601 483; Tak 200 712 (Villiersdorp).
Rekeningnaam – Henning Familiebond; Vermeld u lidnommer en/of
Voorletters en Van as verwysing.**